

KRISTA
TANA
DANGLAM
NGAM

KRISTIAN THALAI

Kristian Thalai Pâwl Chanchinbu thla tin chhuak

July
2015



Vol VI No. 5



YRC hmun tur laih hna thawh mek a ni



Armed Veng Bial KTP Work Camp - Salem Boarding



21st PYF Biennial Conference - Khliehriat, Meghalaya
K.T.P. palaite

Kristian Ṭhalai Pawl chanchinbu thla tin chhuak

1970-a chhuah ṭan ■ Kum 45-naa vawi 7-na ■ Chhuah tawh zat : 441

Editor :

T.Upa Lalmuanpuia

Joint Editors :

Pu C. Laldingliana

Upa K. Rorelkima

Pu V. Lalrinmawia

Pu Vanlalpeka

Manager :

Tv. R. Lalramnghaka

A lak man :

Kum khatah - Rs. 60.00

Copy khat - Rs. 5.00

*Thu chhuah tûr nei chuan
Editor, Kristian Ṭhalai, Synod
Office-ah thawn tûr a ni a; a la
duh chuan KTP Office-ah a man
pêk lâwk a ngai.*

Office Phone : 9436142398

***E-mail : kristianthalai@yahoo.com
centralktp@gmail.com***

Visit us :

cktp.blogspot.com

www.facebook.com/centralktp

KRISTIAN ṬHALAI PAWL

Thupui

Rawngbawl tûra chhandam

Thupui inngahna

Ephesi 2:10 Thil ṭha ti atân Krista
Isuaah chuan siama awmin, ama
kutchhuak kan ni si a, chu thil ṭha tih
chu kan awmna tûrin Pathianin a
buatsaih lâwk a ni.

Thil tumte

1. Isua Krista rinna leh amah anna
kawnga ṭhalaite hruai.
2. Kohhran kut ke ni tura ṭhalaite
buatsaih.
3. Kohhran hnathawh tihpuitlin.
4. Krista Chanchin Ṭha puan darh.

A CHHUNGA THU AWM

1. Editorial	1
2. Khaw nge i Pathian le?	2
3. Sawrkar hnathawh leh rawngbawlna	5
4. PYF Biennial Conference tluang taka hman a ni	9
5. Chaw nghei ṭawngṭai pawimawhna leh hlawkna	14
6. Salem Boarding-ah work camp	19
7. <i>Sunna</i>	21
9. <i>Hringlang tlang</i> – Rawngbawlna danglam	23
10. <i>Rimawi</i> – Fakna hla kungpui Isaac Watts	25
11. <i>Kantu</i> – Tuikual North Branch	28
12. Keimahni	30



Pathian mamawh Kristian Ṭhalaite

Thuhriltu 12:1 ah chuan, “Ivanglai hian i siamtu hrereng rawoh” tih kan hmu.

Bible kan en chuan Ṭhalaite hi Lalpan min mamawhin a rawngbawol tur hian min duh bik em ni aw! a tih theih. Pathianin Evi leh Adama a siam lain Ṭhalai an nih hun ṭha takin a siama. Jacoba, Josefa, Mosia, Josua te pawh hi Ṭhalai an nih lai hunah chiah Pathian kohna an dawnga. Israelten Pathian hnenah Lal neih an dil angin, Tlangval duang ṭha tak mai Saula chu Lal turin a thlansak a. Lal Saula hnuah Lal thar sar veng vawng, hmelṭha tak Davida chu Lal turin a thlansak leh a. Tlangval, Ṭhalai mi pali - Lalpa tana mahni in serh thianghlim tlat mi Daniela te ṭhian ho kan hmu bawok. Isua Krista lo pianna chu Ṭhalai hun hmang mek Mari leh Josepha a ni tih kan hmu. Isua pawh hian Tlangval tha chak a nih lai chiahin rawngbawol hma a ṭan a ni. Tirhkoh Paula chanchinah “Tlangval pakhat a hming Saula (Paula) ke bulah an puante an dah hlawma, tih kan hmu., Lustra khuua tlangval ṭhalai fel tak pakhat Timothea tih kan hmu bawok.

Mihring nun-hun tazwnah hian Vanglai/Ṭhatlai hun hi kan hun hlimawm lai ber a ni. Vanglai hun hi a ṭha zawng/chhe zawng a thiltihtheihna nasa tak kan neih hun lai a ni. Chhungkuaah pawh a chhunga Ṭhalaite nun danin chu chhungkuaah chuan engang mi nge lo la cheng zel dawon tih a tarlang ṭhin a. Hmanlai pi leh pu te chuan mi khuua an zinin an khawlai a Ṭhalai nun dan an hmuh phat atangin, chu khua chu pemna tlak a ni nge ni lo tih a lang ṭhin an ti. Khawtlang zia pawh hi Ṭhalaite kalkhawm nungchangah a lang ber a ni an ti. Kohhranah pawh hian Ṭhalaite nun dan hian nghawng a nei nasa ber a ni.

KELKANG harhna ah pawh Ṭhalaite thlen chin a hriata, Kohhran boruak a danglam nghal dawrh dawrha, Thlarau thianghlim hnathawh ropui tak avangin Kohhran Inkhawm leh Lengkhawm boruak a ṭha in a hlimawm ṭhin hle mai, A van ropui tak em!

John Wesley-a chuan “Ṭhalai rual-Za (100) min pe ula, Ka duhang takin ka enkawol anga, Khawvel hi ka chawok danglam vek thei ang” a ti. Chutiang khawpa dinhmun pawimawh leh thiltihtheihna tha chak kawltu chu ṬHALAI te kan ni. Ṭhalaite hi kan Zoram khawvelah hian Mazohphurhna sang tak Lalpan kan kutah a dah a ni tih hre thar lehin, Siamtun min din chhan ang ngein, kan hma zawna kan rawngbawolna ṭheuhah theih tatop i chhuah ang u.

Sam 127:4- “Mi chakin a kutah Thal a ken chuan tumahin an cho lo va, thiltihtheihna nasa tak a nei a ni”. Chu thiltihtheihna nasa tak neitu chu Ṭhalaite kan ni. Chuvangin, Kristian Ṭhalai, “I ṭhatlai hun a rei dawno, I vanglai hian i siamtu hrereng la, I theih tawpin Lalpa rawngbawol rawoh, Lalpan a mamawh che a ni.”.

— **K. Rorelkima**

Khawnge i Pathian le?

Sam 6:17-20

— Lalmhingsanga Vanchhawng
Secretary, Chawngtlai Branch

Sam 42-na hi Levia chi Temple-a zaihruaitu Kora chhungte zinga tu emaw ber phuah nia rin a ni a. Assuria emaw Babulon sala an tan lai emawa phuah nia ngaih a ni baw. He Sâm phuahtu hian hmana Temple-a Pathian an fak thin dan te, Pathian nena an len dun dan te an dawn kir a, a lung a chhe em em a ni. Sal-a hruai a, neitu, an hmelmate chuan nitin mai hian diriam takin, Khawnge i Pathian le?" an lo ti baw si. He Sam phuahtu dinhmunah hian KṯP te hi kan ding ve reng lo maw? Kan hun kal tawh han thlir kir ila, Pathian faka lam thin te kan khup leh ban a lo uai zo va. Mi dang tidam tura kohte hian mahni pawh kan intidam thei si lo. Pathian kan beisei a, chakna thar leh thlarau thara rawngbawl pawh kan duh thin. Camping leh Crusade te kan nei thin a, mahse, kan

chhungril nun hi a chau ngawih ngawih si. Kan rawngbawl na te pawh hian awmze nei thei lo leh rah tha chhuah thei tak tak lo niten kan hre rum rum thin. Chutih mek lai chuan pawn lam leh chhung lam aṯangin sawisel tumtu leh min sel tumtuten, "Khawnge i Pathian le? min lo ti reng baw si.

1. Pathian hre chiang rawh :
He Sâm phuahtu hian, "Khawnge i Pathian le? tia min zawh laiin "Khawnge ka Pathian le?" tih hi a inzawt nghal a ni. Kan damna tura lo piang, kan tuar aia tuartu Lal Isua chu i Pathian, Lal leh Chhandamtu a ni ngei em le? Chu Lal Isua, khawvel dam nana lo kal a, Kross-a nun petu ngei kha i tan a thi ve em? Chu Pathian nen chuan entin nge in intawh? Chu zawhna chu i chhiar mek lai hian han inzawt teh.

2. Kan eizawнна leh kan chet kan tlatna hmunah hian khawnge i Pathian le? tiin miten min zawt reng

asin : Sumdawnnaa kan khawsak dan te, Political Field-a kan nungchangte, kan thlai thar kan hralh duh dan te, kan Office kal dan te leh kum dik lo va sorkar hna thawka, pension hun pel daih tawh chung a pension chuang si lova Kohhrana a hnar kaitu kan ni leh lawi si te hi mi tam tak thlarau nun vawchhetu kan ni mai lo maw? Politics-a dawt kan sawi hreh miah loh changte hian miten, “Khawnge i Pathian le?” tiin min lo zawt reng thin. Kan chet dan ngaihtuah hian Lalpa ringtute tih awm loh tak hi kan lo ti fo thin em? Keimahni avangin miten Pathian an chawimawi lovin Kohhran hi an hlat phah thei. KṯP-a active tak, zaipawla nung taka zai thin, Kohhrana chanvo chelh ve vung si mite thlarau tihel leh hlaim a, hnuk hnaitu ni lova tiṯiau tu kan lo ni zawk em? “Khawnge i Pathian le?” min lo ti tute hi kan nun hian engtin nge kan lo chhan let dawn? KṯP

hruaitute leh active member-te hi miten min tehna hi a sang bik riau a nia.

3. Kan nun-ah Pathian a Lalber em? : He zawhna hi harsa tak, mahse Kristian, Lal Isua neitute chuan nitina kan zir leh kan neih reng ngai si a ni. Kohhran huang chhungah te, khawtlanga kan rawngbawlnaah te, thenawm khawveng chung a kan rilru put dan te, kan ngaihzawngte bula kan awm te, kan nitin ngaihtuahnaah hian kan Pathian hi a Lalber lo fo mai. KṯP-a active member ni chung sia ruihhlo lo ti ru reng thin kan nih chuan, member hla kan tih fo thinthe hian Kristian engkimtithei tiin kan nunah hmuh tur an nei lo ang. Kan Pathian hian kan nun zawng zawngah Lalber leh neitu nih a duh tlat bawk si. A rawngbawltu ni mai lova, atana mi hlang nih hi a duh a ni. Keimahnia hmun a chan lohna lai leh siam that ngaite siam thain engpawh ti ila “Khawnge i Pathian le?” tih hi keimahni inzawtin kan thinlungah riakin Lalber rawh se.

**4. I ngaihtuahnaah
Pathian lalber rawh se :**

Nitina i hun hman dan kha han chhut let teh. Pathian aia ngaihsak zawk, buaipui zawk leh ngaihhlut zawk eng nge i neih? I hun hlimawm lai ber leh mangan lai ber khan tunge i ngaihtuah a, tunge i beisei thin le? He khawvela kan awm chung chuan, sum leh pai, incheina, in leh lo kan ngaihtuah tur chu a ni teh meuh mai. Mahse, kha kha kan lo Pathian lutuk thei a. Lal Isua Lal berna khan kan dip tir thei tih kan hriata kan inven reng a ngai a ni. Chutiang ni lova chunglam dip thaka kan ngaihtuah chung hi chuan kan thawm hre phak leh mita min hmutute chuan kan Pathian hi biak ve an chak lo khawp ang. TV, Computer, Mibile Phone (social networks) kan hman duh dan leh kan khawsak danah te hian a phenah thil inthup mahse, thup hleih theih si loh tam tak a awm. KṚP tena tihawm chin kan thliar thiam a pawimawh a ni. Inkhawm thulh khawpa hmuh nawm kan thliar changte hian mite hnenah Chanchin

Tha hi kan ti thangtlawm em em a ni.

5. Rawngbawl hona :

Rawng kan bawl honaah hian Pathian hi a Lalber thin em tih kan inchhut fo a pawimawh em em a ni. Rawngbawl naah Pathian dah hmasa lova, keimahni kan lansirh chuan a dik tawh lo ang. KṚP te hian inbihchian a kan inen fo a ngai a, solo-a zai thin kan nih dan te, zaipawl zaiah te, thusawiah leh kan sum tuak danah te hian Pathian dah hmasa lovin kan theihna kan chhuang hmasa thin em tih te inenfiah fo kan ngai a ni. Thawh hopui nuam kan nih leh nih lohah te hian Pathian hmel a lang thin a, miten “Khawnge i Pathian le?” tiin min thliar reng thin. KṚP leh Kohhrana kan chetvel danah te hian miten “Khawnge i Pathian le? / Khawnge a Pathian le? tiin min lo thliar a, min zir reng thin a ni. Engpawhnise, khawvelah kan la awm miau a, famkim tumah kan awm lo ang. Mahse KṚP-te chu kan danglam ngam tur a ni dawn lawm ni•

Sawrkar hnathawh leh rawngbawlina

— Laldinpuia Tlau,
Kanan Br.

mizote hi sawrkar hnathawk ngaisang hnam kan ni a, khaw thenkhatah chuan, an khuaa sawrkar hnathawk awmte chu an lo pak huam huam thin niin an sawi. Hemi avang hian indem ngawt tur pawh a ni chuang lo. Mizote chang ni loin, ram thang mek (developing country) apiangah sawrkar hna a hlu an ti. Chuvang chuan, thalai lehkhathiam zingah, sawrkar hnaa lut loa hun puma rawngbawl tum, politics khelh tum, sawrkar puihna tel loa mahni kea din tum chu khawvar lam arsi ang pharh an ni.

Sawrkar hna hi dil thei tur chuan kum 18 aia naupang lo, kum 35 aia upa lo an ni tur a ni a, tribal hnam kan nih avangin kum 5 thlengin upat kawngah ngaih hnathiamna a awm. Sawrkar hnathawk tur

mi chu, kum 18 aia naupang lo, kum 40 aia upa lo tihna a ni. Sawrkar hna thawk tur chuan, KTP member a nih lai ngei ngeia a thawh a ngai kan ti thei ang.

Sawrkar hnathawk awmzia

Mi thenkhat chu Sawrkar building sa te, a hmunhma sam fai te, rawng hnawih tha te, office parda su faitein an inhlawh fo a, sawrkarin an hlawh pawh a pe ngei a, mahse tumahin sawrkar hnathawk kan tingai lo. Chuvang chuan sawrkar hnathawk tih chu India danpui chang 309 tlawhchhana rules siam hnuaia thawkte sawina a ni a, chung mite chu sawrkar hnuaiah a ngheta thawk, sawrkar hnuaia kun, thawh tan ni leh pension hun nei, sawrkarin thla tin hlawh a pekte hi an ni.

Hna zawn laia rilru tur

Sawrkar hna hi kan ngaihhlut em avang hian hmuh kan tum dan thinlung pawh a thianghlim duh lo hle. Hna latute thianghlim loh vang nge a diltute thianghlim

loh vang tih hi inhnialna
ṭangkai lo a ni. Pathian
malsawm tlaka rim taka
inbuatsaih leh theihtawp
chhuaha beih hi hna diltu lam
chan a ni. Kan Pathian hi a
nung a, lei malsawmna pawh
hi kan tan a dah a. Vanah mai
ni lo, leia thuneihna zawng
zawng pawh pek a ni tawh
a. Malsawmna vur leh vur
loh chu Pathian lam chan
a ni. 'Ka hna hi Lalpa min
pek a ni' tingam ṭhalai
Lalpan a zawng i han ti ve
teh ang. 'Tun lai khawvelah
chuan' kan la ti ṭalh a nih
pawhin, 'he khawvel dan
anga awm lo tur' KṭP
member kan ni e.

Sawrkar hnathawk mizia tur

KṭP member, sawrkar
hna zawng mekte hian
sawrkar hna hi kan thawk
ngam tak tak dawn em tih hi
inngaihtuah lawk phawt a ṭha
e. Sawrkar hnathawk chuan a
hna a tlin (efficient) tur a ni a,
rinawmna (integrity) nunpui
mi a ni tur a ni a, hleih nei mi
a ni tur a ni lo a,
mawhphurhna la ngam mi a
ni tur a ni a, mipui
rawngbawltu a nih angin a

nun a vawng fel tur a ni. Dan
ang taka a hlawh (legal
remuneration) chauh a la
thiang a, intlawnna lam chi
reng reng (gratification) a
dawng thiang lo.

Sawrkar hnathawh ṭhatna

Mahni kea ding turin
inzirtirin sawi mawi ṭhin mah
ila, kan ram dinhmunin a zir
loh vang a ni ang e, sawrkar
hna nge nge hi a lo ṭha.
Private school leh mimal
hnuaia thawkte hlawh a
beitham tlangpui. Duh duha
inban theih loh a nihna te,
chawlh lak lai pawha hlawhbi
ngai reng lak theih te, dam
loh nikhuuaa chhungte nen
lama MR bill theih te, kum
tina hlawh pung te, DA lo
pung ṭhin te, kaisanna pawh
hunin a her chhuah pui mai
nia a lang te, pension hnu
thlenga sawrkarin a umzui
dan te, sawrkar hnathawk
mekte an lo thiha sawrkarin
a ral ṭhin dan te, hamṭhatna
hrang hrang a pek dante
chhut hi chuan hna
thlanawm tak a va ni tak
em! Sawrkar hna thlumzia
hi a zûk tawh tute ngeiin an
hre Chiang.

Sawrkar hnathawh that tawk lohna

Thalaiten chona an hmachhawn theih nan sawrkar hna thawh that lohna lam hi sawi ve hrim hrim a chakawm. Sawrkar hnathawkte reng reng chu an hun pumin sawrkar hnuaia kun an ni a, laklawh neih a thiang lo a, hla te khuaah pawh kal vang vang ngaih chang a awm a, chhungkua han inkalsan dawr dawr tul chang a awm a, a chang leh kohhran leh khawtlanga mawhpurna phat tul chang a awm. Sawrkar hnathawkte thupui leh tihhlawhtlin tum ber chu public interest leh a ruaitu Ministry thawhpui a ni a. Chuvang chuan sawrkar hnathawkte lote aiin an zalenna a zim zawk lo thei lo. Duh duh sawi a rem lo a, chanchinbua duh duh han ziah ve mai lah a rem hek lo. Sawrkar hnathawh that tawk lohzia hmu chiangtu, an hun laia sawrkar hna thata lut thei lut ta lo leh ban san leh thuai ho zingah hian mi hlawhtling leh challeng tak tak an awm thluah mai.

Sawrkar hnathawh hi hausak pui tham a ni lo.

Kohhran pawh hian thawhlawm thawh teuh teuh tur an nei lo tih hriat sak a hun. Hausak duh mi tan chuan sawrkara luh loh hi a finthlak mai thei. Khawvel a changkang chho zel a. A duh duhin sawrkar thau an sawh thinna hun a liam tan a, kut tling loa hausate pawh, an bul leh an hma lamah la kawkn gam rih lo mah ila, an hnung lamah tal chuan kan kawkn gam ve tan ta a, thangtharte chuan an la chapchar ngam ngei ang.

Han duh thawh zel ila. Mi thenkhat chuan, sawrkar hna thata tak an hmuh leh an thawh hi an chhiat pui. Zu in ngai lo in ta te, mipat hmeichiatna kawnga ninhlei ngai lo ninhlei ta viau te, suma mualpho tak tak te, kohhran thlahthlam tak tak te hi, an hna hmasa zawk, mi ngaiha thata lo zawk kha lo thawk zel ta se, tun ang tho hi an ni ang tih rin har tak a ni. A petu Isua ni loa a thil pek, lei hausakna duh zawk officer chu a buai ngei ngei a, sualna khurpui lam chu a pan zel thin.

Sawrkar hnathawkte kan tehna tur

Zoramini Harhna a chan

mek lai hian, sawrkar hnathawk kan tehna tur leh kan beisei dan tur hi bengsika ngaihtuah a hun ta hle mai.

Innei an awm reng rengin, mo chungchanga zawhna tlanglawn ber chu "Monu a hmeltha em?" tih a ni a, moneitu chungchangah chuan "Mopa chu eng hna thawk nge?" tih hi a ni awm e. Hei hian Mizo rilru a tilang hlein ka hria. Sawrkar hnathawk reng reng, an hnathawh chungchangah kan beng a za a, an hna an thawh dan chungchang chu kan bengkhawn vak lo. Thil pawimawh ber fo chu, "*Eng hna nge ka thawh?*" tih ni loin "*Eng tin nge ka thawh?*" tih hi a ni. Piantharna kan chan hian, ofis hun vawn dik kawngah te, hnaa rinawmna kawngah te, mahni hlawha lungawi kawngah te, biak nawm kawngah te kawngro sut phah rawh se. Pathian chu a mite hnenah '*Awma ka ni*' tiin a inpuang thin a. Sawrkar hnathawkte hi kan ofis theuhah hian, ofis kai chhung na na na chuan '*Awma/Awmi*' kan ni ve dawn lawm ni?

Ram ni tla seng lo Kumpinu rama sal chhuahtu ropui ber, William Wilberforce, MP hmingthang chungchuang chuan a lo piantharin, a hun laia rawngbawltu ropui John Newton, lawng captain bansan ve bawk chu Pathian rawng a bawl dan tur chungchangah a rawn a. John Newton chuan MP nihna bansan turin thurawn a pe reng reng lo. Baptistu Johana rawngbawl naa piangthar chhiahkhawntute chu dan phal baka chhiah khawn lo tura hriat tir an ni a, sipaite pawh mi sum chhuh sak lo tur te, dawta mi puh lo tur te, an hlawha lungawi tur tein hrilh an ni. Hun puma rawngbawl na hi sawi nep ka tumna a ni lo a, hnaa rinawmna hi Pathian laka rinawmna a nihzia sawi lan tumna a ni. Sawrkar hnathawkte hian kan hna theuh hi Pathian rawngbawl naa kan pawm chuan rorelna dik hi lui angin a luang ang. KTP member-te hi kan thawhna Department theuhah '*a chhe lai siamthatu*' kan ni dawn lawm ni?

PYF BIENNIAL CONFERENCE TLUANG TAKA HMAN A NI

— Laltluangpuia, Saiha Bial

Kumkhat dan a hman thin Presbyterian Church of India hnuai a, Thalai Pawl intawhkhawmna PYF Biennial Conference vawi 21-na chu May ni 1-3, 2015 chhung khan Khliehriat Kohhran Biak In, Meghalaya, KJP Synod Mihngi ah neih a ni a, tun tum Conference thupui hi 'Youth-The Aroma of Christ' (Thalai-Krista Rimtui) II Korinth 2:15 hman a ni.

ENGE PYF?

Thianten khawnge i kal an tih a PYF Inkhawmpuiah ka kal ka tih hian hrethiamlo hi an awm leh thin a, chuang chuan PYF kan tih tobul hi tawite in han sawi lawk ila.

Kum 1841, June 22-a Presbyterian Church of Wales atanga Missionary lokal Rev. Thomas Jones I leh a nupui tena Sohra (Cherapunjee, Meghalaya State) leilung an rawn rah atang khan Presbyterian Church of India kan tih tak hi lo intan chho ani a, hemi hmun atang hian darh zau zelin kohhran member an lo tam chho zel a, kum 1926 ah kohhran roelna sang ber ni

turin The Synod of the Presbyterian Church in Assam tih chu Assembly 2 nein din a ni a, a khaikhawm Assembly ho chu Synod tiin thlak a ni a, kum 15 hnu 1968 ah Presbyterian Church in North East India (PCNEI) ti a thlak a ni a. Kum 1992 atangin Presbyterian Church of India (PCI) tih hming hi puttir a ni ta a ni. PYF hi kum 1974-a PCI Assembly Halflong a neih tum a din a ni a, tunah hian kum 41-na a hman mek a ni. PYF Conference hmasa ber hi May ni 8-11, 1975 ah Jowai-ah neih a ni. Tunah hian PYF ah hian Unit 12 kan awm a, heng zinga 9 te hi Active member an niin 3 te hi Associate member an ni. Associate member-te hi an mahni a Synod hran nilo Synod dang hnuai a awm an ni.

Active member-te:

1. CKTP, Mizoram Synod
2. Jingiaseng Samla, KJP Synod Sepngi
3. Jingiaseng Samla, KJP Synod Mihngi
4. Ri Bhoi Synod PYF
5. Manipur Synod PYF (MPYF)

6. Cachar Hill Tribes Synod PYF (CHT)
7. Kristian Vanglai Pol,
Biateram Synod (KVP)
8. Zou, Synod PYF
9. Presbyterian Riso Nimso
Amei (PRNA), Karbi Anglong
Synod (March 29, 2015-a din)

Associate member:

1. Kristio Jubo Songho (KJS),
Barak Valley
2. Meitei Presbyterian Christian
Nahapur (MPCN)
3. Tripura PYF

Zinkawng:

April ni 30, 2015 (Ningani) zan dar 8:16-ah CKTP aiawh palai te chu Bus 3 in Synod office kawt aṭangin inkhawmpui kan neihna hmun tur Khliehriat lam pan chuan kan chhuak a, Mizoram Unit aṭang hian bial 70 aṭangin palai 1 theuh kal tura kan inbesei laiin kal theilo bial an awm nual a. CKTP lam aṭangin kan zinga rawn tel te nen 66 vel kan ni a. Kal lam hian kan tluang lo hle a zinglam dar 4 velah kan Bus 1 Silchar thlen hmian a chhe hlah mai a. Bus 3-a chuang kha Bus 2-ah kan inbeng a, chutih rual chuan palaiteah hreawm ti hmel kan awmlo te kha a lawmawm hle a ni. Varṭian ah Silchar kan lut a, Synod Mission Compound-ah kan innghat a. Kan CKTP hruaitute an fakawm, khawlum leh vaihmite karah chauh pawh

sawi hmanlo a motor that theihna tura an han phe vat vat te kha a ropui hle a ni. Bus an siam that hun nghak chuan Silchar Mission Compound-ah chuan kan awm ta a. Tukṭhuan te pawh kan ei nghal a, ril a ṭam tawh baw a niang chaw ei a tui duh kher mai. Tukṭhuan eikham chuan kan chau tlang baw aniang room tin mai chu a rik hian a ri bawrhawrh a ni ber e, thlawk hniam fe fe kan tam khawp mai. Bus chu a that theih mai loh avang chuan kan khawtlai lutuk dawn a kan hriat avangin chawhnu dar 2:14-ah Silchar chu kan chhuahsan ta a a ni. Zan dar 6:40-ah inkhawmpui kan neihna hmun tur Thliehriat chu kan thleng ta a, thaw a veng huai mai. Kan thlen hnu reiloteah kan Synod choir te pawh an lo thleng ve nghal a.

Hun hmandan tlangpui :

Zirtawp zan hi Palai lawm inkhawm leh thupui sawihawwna (keynote adress) hun atan hman a ni a. Rev. G.S Lyttan, Administrative Secretary in Keynote address sawiin zaipawl hi a thlengtu kohhran hnen aṭangin welcome song mawi tak kan ngaithla a, KVP, Biateram Synod, JS KJPS Mihngi, leh PYF (Ri Bhoi Synod) an zai baw a ni.

Inrinni Chawhma leh Chawhnu hi rorel leh Rawngbawlna report-a hun hman a ni a, zing dar 10:30-ah òanin tlai dar 2:30 thleng hun hman a ni. Rorel zawh hian sight-seeing, thlengtu kohhran hruaina a neih a ni a, Khliehriat àanga km 40 vela hla Leshka Hydel Project min en pui a, a manhla hle mai.

Inrinni zan Pathian Biak Inkhawm ah Rev. Khawthanglien Infimate (CHT) hnen àangin inkhawmpui thupui ngaihthlak a ni a, Krista a rimtui kan nih theih nan midangte ngaihdamtu nih a pawimawh thu uar takin a sawi a ni. Zaipawl hi Mizoram Synod Choir, JS KJPS Sepngi leh MPYF, Manipur Synod te an zai bawk a ni.

Pathianni zing dar 8:00 PCI Moderator D.C. Haia'n Lalpa Zanriah Sacrament a òheh a, Pathianni chawhma dar 10:30 Vantlang Pathian Biak inkhawm neih leh a ni a, hetah hian Rev. KP Masharing E/S Ri Bhoi Synod hnen àangin thuchah kan ngaihthla leh a, chawhma inkhawmah hian Mizoram Synod Choir ten zai an hruai a, zai a nuam bik hle. Darkar 2 leh minute 50 zet kan inkhawm a ni. Zaipawl hi

Mizoram Synod Choir, RPYF Ri Bhoi Synod, ZPYF Zou Synod, JS KJPS Mihngi leh Manipur Synod àangte in kan ngaihthla a ni.

Chawhnu dar 2 ah Rev. D.S Sokhlet, Senior Excutive Secretary, KJP Synod Sepngi hnen àangin thuchah kan ngaihthla leh a, àanna hun hi Mizoram Synod àangin CKTP hruaitu Pu C. Laldinglana'n a hman a, chibai bukna NEICCYA Secretary Dr. Lalliansanga hnen àangin ngaihthlak a ni bawk. Chawhnu inkhawm hi dar 1:30 a àan tura tih kha a ni a, chawhma lam thusawitu in hun a hman rei deuh avangin dar 2 ah kan àan a ni. Chawhnu inkhawmah hian zaipawl 4 - Mizoram Synod Choir, KVP Biateram Synod, JS KJPS Sepngi leh thlengtu Kohhran zaipawlte àangin fak hla mawi tak tak kan ngaihthla leh a ni.

Pathianni zan hi PYF hruaitu thar hlanna inkhawm niin PCI Moderator-in hruaitu thar te Pathian hnena a hlan zawh ah, Leader thar Rev.Khamchinkhai hnen àangin thusawi kan ngaihthla a, PYF Leader kalchhuak Rev. J.F. Lalropuia hnen àangin thlahna thuchah (Vedictory Sermon) kan ngaihthla bawk.

Inrinni zan leh Pathianni zan hian, inkhawm banah Variety Programme kan hmanq thin a, compares te hi Rev. K. Laloo, member, Ed.B leh Mrs Samaria Pathaw, CCM te an ni a, an zeibawk aniang a hlimawm thin hle mai. Rilru khawih tak tak drama te, mit leh beng ti tlai tak tak entir nei tha tak tak en tur a awm nual a, a kham awmluh thin hle.

Inkhawm apiangin Zaipawl 4/5 an zai ziah a, Unit hrang hrang atangin Synod Choir te bakah a thlengtu kohhran zaipawl te an zai thei a. Inrinni zan inkhawm atangin Pathian Biak inkhawm apiangah Mizoram Synod Choir te an zai a, Sap hla 4 leh Mizo hla 2 an sa a ni.

Thurelte :

Rorel Palai hi 361 kan ni a Mizoram Synod atang palai 90 kan kal a ni.

1. PYF inhruaina dan (guidelines) ennawn chungchang (Biennial conference vawi 20 na Fiangpui, Halflong 2013-a pawm tawh) hmalak mek niin Assembly Executive Committee kutah awm mek tiin in hrilhfhah a ni.

2. PYF thawktu nghet neih tur

rawtna (Biennial Conference vawi 20-na Fiangpui Halflong 2013 pawm tawh) chu thlir ho a ni a, siamthat ngai laite lo siam tha turin Administrative Secretary i/c PYF te ruat an ni a, PCI Moderator in lo enpuuin Assembly Executive Committee a thehluh tura rel a ni.

3. Biennial Conference vawi 22 na (kum 2017 a neih tur) Thlengtu - PYF , Manipur Presbyterian Church Synod, A hun - 5th - 7th May 2017.

4. PYF Youth Camp 2016 thlengtu tur - Jingiaseng Samla, KJP Synod Sepngi, A hun: 21th-23th October 2016.

5. Biennial Assembly leh Youth camp te felfai zawk a kalpui a nih theih nan Registrar Pahnih neih rem tih a ni.

6. Budget :

2015-16=Rs 4,10,000

2016- 17=Rs 4,20,000

Total - Rs 8,30,000

7. Kum 2015-2016 atana hruaitu thlan tharte:

Leader : Rev. Khamchinkhai (PCI ruat)

A. Leader: Rev. Bidonbok Syem (KJP Synod Sepngi)

Secretary : Rev. D.F Dkhar (KJP Synod Mihngi)

A.Secretary

: Mr. Joseph Lalsangzuala
(CKTP Mizoram Synod)

Treasurer :Pro. Pastor Kisaming
Newme (CHT Synod)

Central committee member (CCM) :

1. Mr. K.Lalruatpuia
(CKTP, Mizoram synod)
2. Rev. J.M Paswet
(KJP, Synod Mihngi)
3. Rev.JohnRockyKharmawlong
(KJP Synod sepngi)
4. Pro Pastor Jubilithang
Hrangchal (CHT Synod)
5. Rev.Khaminlian
(Zou Synod)
6. Ms.Elina Ngamlai
(Biateram Synod)
7. Rev. Khrawbok Rympei
(Ri Bhoi synod)
8. Mr.C.Lalbiaktluanga
(Manipur, Synod)

A thlengtu lam:

Khliehriat Kohhran hi 1969 a din a ni a, a din tirh hian Kohhran member 25 chauh an ni a. Tunah hian member 1939 lai an ni tawh a, Pastor 2 in an enkawl a, Kohhran Upa 7 awmin, Tual Upa 15 an awm bawk. KTP member hi 719 an awm mek.

An inbuatsaihna a tha hle. Kan thlen zana kan thlenin tura min dah har deuh tih mai loh kha chu sawisel tur an awmlo a ni ber mai. Mikhual min duat

thiam a, Biangbiak pawh an nuamin hlim hmel pu sanga min chhawn thei reng te kha an fakawm. Thilpek an ngaipawimawh leh an pe tha em em mai te kha an entawntlak hle a ni. An Kohhran Biak In pawh a lian a, hmun hma pawh an nei tha hle. Pulpit hnung dawhsan ah zaipawl thutna bik Choir stall an siam a, a remchang hle, tukthuan leh zanriah hi a huhovin min siamsak ziah a, Engtiklai pawh a thingpui sen leh a paw leh kuai (Kuhva) ei tur a awm reng te kha a nuam dangdai khawp mai. An in pekna a ropui hle a, lehpek thleng leh turte tana huphurhawm khawp in an in pekna a ropui.

Tlangkawmna:

Tun tum PYF Conference chu a nuam tih hian a fun kim ber in ka hria. A dawngtu hian min dawl zo bawk a, tisa leh thlarau ah kan tlai hle. Hnam hrang hrang a hu ho a Pathian kan han fak za te kha a va ropui em, vanram kan hnaih uar ten ka hre thin.

A tawp ber ah chuan kan inkhawmpui tluang taka min hmantirtu leh amah fak nan a hun tha min petu LALPA chu fakin awm rawh se•

Chaw nghei ṭawngṭai pawimawhna leh hlawkna

— C. Lalnuntlinga,
Salem Veng

Ram pum huapin KṭP ten chawngheia ṭawngṭai nei tawh mah ila, Branch/Evangelical Sub-Committee/Mimala chaw nghei ṭawngṭai kan la nei zelin a rinawm a. Chawng nghei ṭawngṭai awmzia leh pawimawhna i han zirho teh ang.

Mizoten Chaw nghei (Sap ṭawnga -Fast) kan tih hi Thuthlung Hluiah chuan Hebrai ṭawng, 'Tsom' tih hman a ni a. Mahni duhthu ngeia chaw nghei sawina a ni a. A awmzia chu 'Mahni inphat/inphah hniam' tihna a ni. Thuthlung Tharah chuan Greek ṭawng, 'nesteia' tih hman a ni a, chu pawh chu mahni inphat/inngaitlawm/inphah hniam tihna tho a ni. Bible-ah hian chaw nghei tih te, chaw ngheia ṭawngṭai tih te, engmah ei lo ti tein a sawi a, a awmzia leh a tum chu thuhmun a ni. India rama Kohhran ṭhenkhatah chuan Sacrament an ṭheh dawnin Pastor-te leh Kohhran mipuiin

chaw an nghei ṭhin a. Mizoramah pawh chaw nghei pawimawhna kan hre chhovin Kohhran/KṭP te pawhin hma kan sawn ve zel a pawimawh hle.

Chaw nghei ṭawngṭai chi hrang hrangte:

Mi thiamte chuan chaw nghei ṭawngṭai hi chi hrang hrangin an ṭhen a, chungte chu:

1. *Normal Fast/Ordinary Fast*- Hun bituk neia tui/thei tui emaw chauh ina chaw nghei hi a ni. Mizorama kan hman ṭhin dan tlangpui hi a ni.
2. *Absolute Fast/Complete Fast*- Engmah ei/in lova chaw nghei hi a ni. Bible-ah chuan Isua, Mosia, Paula etc khan hetiang chaw nghei hi an nei. Mihring pangngai tan chuan ni tam neih theih lova ngaih a ni.
3. *Partial Fast*- Ei chin tawk neih emaw, ni khata chaw vawi khat chauh ei emaw (Tukṭhuan/Zanriah chaw chauh ei) hi a ni. John Westley chuan chhang chauh eiin chaw a nghei ṭhin.
4. *Rotational Fast*- Ni khat/ni hnih/ni li etc dana chaw, chhang emaw chaw emaw ei ang chi hi a ni.

Zanriah chaw kan nghei a nih chuan a tuk zing (tuk ṭhuan) thleng kan nghei khan chhuan khat kan nghei chiah a. Tlaiah chaw kan ei lo va, inkhawm

banah emaw tukthuan chaw ei hun pangngai aia hmaa kan ei leh emaw a nih chuan chaw ei hun kan sawn hla tihna mai a ni! Chaw nghei a tling lo. Chaw nghei dawn avanga thil engemaw lo ei puar lawk te, chaw ni lo thil dang lo ei te hi chin loh a tha hle. Thlarau lama hlawkna chhar miah lovin i nghei thlawn thei a ni.

Tihtakzetna, inpekna leh hlawkpui ngei tuma chaw nghei hi a hlawk ber a, KTP hmalakna a nih avanga riltham hrehawm lo tawka i nghei ve ngawt a nih chuan chaw nghei thawngtai hlawhtlinna leh hlawkna i thleng pha lo vang. I hriselna dinhmunin a zir ngang lo a nih loh chuan rilthamin hrehawm deuh mah se hlawkpui ngei tumin, rilthamin chaw nghei thin ang che.

Chaw nghei ve lo tur te:

Mi thiamte chuan chaw nghei hi hriselna dinhmun azirin mi zawng zawng tan neih a him lo a ni an ti. Duhthusamah chuan Chaw nghei neih hmain doctor-te rawn tur a ni an ti. A tlangpuiin raipuar/nau hnute pe lai, naupang thanglai, kum upa lam, damkawr, zai taw, Zunthlum vei, thin tha lo, lung na nei, kal tha lo leh Cancer, Tumours, natna benvawn nei te tan chuan nghawng tha lo zawk

a neih theih avangin chaw nghei neih hi fimkhur hle a ngai.

Taksa tana chaw nghei thatna:

Chaw nghei hi thlarau tan chauh ni lo, kan taksa hriselna atan pawh hian a lo tha em em mai a ni! 'What the Bible Says about Healthy Living' ziaktu Dr. Rex Russell chuan chaw nghei hi taksa leh thlarau tana thatpui turin Pathianin a siam a ni a ti! Pathianin thil a siam lai pawh khan ni sarhih ni chu chawlh hahdamna ni atan a hmang ang bawkin kan taksa pawh hian chawlh hahdam a mamawh a ni a ti.

Dr. Russell sawi dan chuan kan taksa hian natna do let nan chaw nghei hi a mamawh nia sawiin, kan taksa tana pawimawh lo paih chhuah nan pawh chaw nghei hi a pawimawh hle a ni a ti baw. Hman lai leh tunhnaia zirchiangtuten an hmuh chhuah dan chuan chaw nghei thatna pakhat chu 'Natna dolet nan' a ni an ti.

Hippocrates, Father of Medicine chuan natna do let nan kum 2400 hma lam khan damlote chaw nghei a lo chawh tawh thin! Hmanlai atangin tawhin Hindu sakhuaa Ayurvedic thiamte pawhin chaw pai thawihna puitu atan kartin chaw nghei a that thu an

lo sawi daih tawh bawk. Chutiang bawkin hnam fing hmasa, Chinese-te pawhin an chanchin hriat theih tirh aṭangin chaw an lo nghei tawh a ni. Kan taksa hian chawlh hahdam a mamawh ang bawkin kan Digestive Systems pawh hian chawlh hahdam a mamawh a ni. Dr. Richard Weindruch (University of California, Los Angeles)-in Chaichim aṭanga a zirchiannain a tarlan danin Chaichim, chaw nghei fote chu duh hun huna chaw ei tur nei Chaichimte aiin an dam rei zawk a, an hrisel zawk bawk. Duh hun huna chaw ei tur neite chu an hrisel lo zawk a, an damrei lo zawk tih a hmu chhuak bawk! Chaw hi kan ei tur, hriselna leh chakna tura mamawh a nih rualin chhum lo chat lova ei ai chuan a khat tawka nghei zeuh zeuh hi hriselna pawhin a ṭhatpui zawk a lo ni reng mai!

Eng vangin nge chaw kan nghei ang?

David Livingstone-a chuan, "Tum mumal nei lova chaw nghei leh ṭawngṭai tlaivar hi hun khawhralna mai a ni," a ti hial! Chuvangin, chaw nghei ṭawngṭai hlawhtling zawk nei tur chuan chhan leh vang mumal tak a awm ngai a, kan nghei chhan leh tum ang ngeia

ṭawngṭai dan pawh kan kalpui a pawimawh. Chaw nghei chhan tur chu chi hrang hrang a awm thei ang, chung zinga pawimawh zual chauh han tarlang ila:

1. Pathian chawimawina:

Chaw nghei hian a tum chu Pathian chawimawi a ni. Pathian ropuina tur leh Amah chawimawina rilru kan pu tur a ni.

2. Mahni innngaihtlawmna:

Chaw nghei awmzia kan tarlan tak ang khan a awmzia pawh innngaihtlawm entirna a ni. Chaw nghei hi Pathian hmaa kan tlawmna lantirna a ni. II Chro. 7:14-ah chuan, "Ka hming pu ka mite chuan innngaitlâwma an ṭawngṭai a, min zawn a, an awm dan sualte an hawisan chuan, vân aṭangin ka lo ngaithla ang a, an sualte ka ngaidam ang a, an ram chu ka tidam leh ang," a ti.

3. Harsatna sutkian nan:

Tisa leh Thlarauva kan harsatna sutkianna turin chaw nghei hi kan neih fo a ṭangkai hle a ni.

4. Sal tangte/sual phuarte zalen nan:

Kan mimal nun, chhungkua, khawtlang leh ram sual phuara awm mekten tisa leh thlarauva zalenna an chan theih nan. Sual

sim theih loh (ruitheihthil/zuk leh hmuam etc) laka zalenna chan nan.

5. *Pathian aw hriatna leh an inpuan nan:*

Kan mimal nuna Pathian inpuanna leh aaw chiang zawka kan hriatna hmanrua atan a tangkai hle. Daniala 9:3-ah chuan, "Tin, chaw ngheiin, saiip puan te, vaivut te nêñ ÷awngñaina leh dîlna zawngin LALPA Pathian lam chu ka hawi a," a ti.

6. *Harhna chan nan:*

Pathian Thlarauva harh tharna dil nan a pawimawh.

7. *Thil ÷ha lo laka Pathian venhimna dil nan:* Mimal, chhungkaw, khawtlang leh rama thil ÷ha lo lo thleng tur laka Pathian venhimna dil nan.

8. *Sual simna leh hlawhchham a÷anga beidawonna:*

Mimal, khawtlang leh Ramin Pathian pawli an tak kan khawih avanga ngaihdam dil nan leh simna entirna a ni.

Bible-a chaw nghei ÷awngñai thiltihtheihna:

Bible-ah hian chaw nghei ÷awngñai hlawhtlinna leh thiltihtheihna hmun tam takah kan hmu a, tarlan vek sen a ni lo

va, tawi te tein ÷henkhat chauh han tarlang ang:

1. Zawlnei Samuela hi a nu (Hani) chaw nghei ÷awngñai vanga piang a ni! Hani hian a Pasal Elkana tan fa a hrin theih loh avangin a mopuinuin a hmusit a, Hani chuan chaw a nghei ta a. Pathianin a chhang a, Samuela hi a lo piang ta a ni (I Sam. 1:9-20).

2. Estheri lehkhabuah khan Lal thupekin Juda te chu suat chimih vekna tur 'order' a awm a. Judate chuan chaw ngheiin hun an hmang a (Est. 4,5,6). Lal chuan a thupek sutin Juda te chu chhandamin an awm ta a ni. Judate chuan tun thlengin Purim Kûtah Estheri lehkhabu hi a chhiar ÷hin nghe nghe.

3. Puithiam Ezra chuan Temple-a hlan tur bungrua hlu em em mai an ken chu Pathian venhimna dilin chaw an nghei a, Pathianin a venghim (Ezr. 8:21-23).

4. Jona- Ninevi khawpui sual tak mai chu an sual avangin Pathianin an sim loh chuan a tihboral tur thu Jona kaltlangin a puang a. Ninevi khua chuan Lal leh an ran rual te nen lam inçhira inlamletin engmah ei/ in lovin Pathian ngaihdamna an

dil a. Pathianin a ngaidam (Jon. 3:1-10).

5. Hruaitu ropui, Mosia khan Pathian hnen aṭanga Thusawm pek a lak khan ni 40 leh zan 40 engmah a ei lo (Ex. 34:28).

6. Lal Isua khan rawngbawlina a ṭan dawnin ni 40 leh zan 40 engmah ei lovin a awm (Mt. 4:2).

7. Paula- Engin a chhun a, rawngbawlina a ṭan hmain ni thum engmah a ei lo (Tirh 9:9).

Kohhran hruaitu hmasate leh chaw nghei ṭawngṭai:

Siamṭhat hna thawktu, Martin Luther-a kha chaw nghei nei nasa em em mai a ni a. Miten an sawiselna ber pakhat chu 'chaw nghei a uar lutuk' tih a ni! John Calvin pawh kha Geneva khawpui Pathian hnena an kir lehna turin chaw a nghei a, Pathianin a chhang a.

John Knox's pawh kha chaw nghei ṭawngṭai nei nasa zet mai a ni a. Queen Mary pawh khan ralthuam dang zawng aiin John Knox's-a ṭawngṭaina kha a hlau zawk a ni an ti. John Knox-a tihtakzeta a ṭawngṭai chuan engemaw tal a thleng ngei ngei ṭhin an ti.

Jonathan Edwards, America rama harhna sulsutu ber pawh kha chaw nghei nei ṭhin a ni a. John Wesley pawh kha kar khatah ni hnih chaw a ngei ṭhin!

Chaw kan nghei zel ang

Pathian rinna kawnga i chak nan te, i thlarau nun chau chak nan te, tisa leh thlarauva i mamawh thlen nan te, kawppui ṭha tak i neih theih nan te, Pathian aw i hriat theih nan te, Pathian venna dil nan te, sual ngaihdamna dil nan te, Hna thar hmuh nan/eizawwna dil nan te, KṮP/Kohhran hmalakna piah lamah mimal pawha chaw nghei fo hi a pawimawh hle.

Tisa rilṭamna chu Thlarauva i puarna tur hmanrua a ni zawk tih hre reng la. Chaw nghei i la nei ngai lo emaw i lo nei fo tawh ṭhin emaw pawh a ni thei. Rinna kawnga hmasawn nan Chaw nghei ṭawngṭai uar lehzuala neih i ṭum ang u. KṮP te pawhin Member hlate pual emaw tisa leh thlarauva malsawmna chang tur emawa chaw nghei ṭawngṭai hi uar lehzual, urhsun zawka neih kawngah pawh ṭan la ila. Chaw nghei ṭawngṭai hlawkna leh hlutna chhar ṭheuh turin chaw i nghei zel ang u•

Salem Boarding-ah WORK CAMP

— David Lalnunzira
Secretary,
Armed Veng Bial

Armed Veng Pastor Bial KTP Conference vawi 22-na in a lo rel "Kum 2015 chhungin Bial Work Camp neih ni rawh se" tih chu Bial KTP Committee-in bawhzuiin Ni 15-18,4.2015 chhungin Salem Boarding, Home Mission North-ah work camp neih a ni a, member 31 (mipa-27, hmeichhia-4) kan kal.

April ni 15, 2015 (Nilaini) zing dar 6:45 ah Bus-in kan chhuak a, chawhnu dar 1:20-ah Teirei khaw pelhah Salem Boarding-a zirlai 40 velin min lo hmuak a. Bus a luh theih tawh loh avangin kan thawmhnaw leh bungrua te chu tractor-in min phurhsak a, helai hmun aṭang hian km. 1.5 vel kea kal lehin tluang takin chawhnu dar 2:10-ah Salem Boarding Compound kan thleng ta a ni.

Thawktuten ṭha taka min lo dawng sawngin kan iptepui banna tur min siam sak a, keimahnia inkulha khawsa kan nih avangin hemi tlai ah chauh hian kan thlen inah chaw kan ei a ni.

Kan thlen zan hian Chapel-ah inkhawmna hun hman a ni a, Bial Secretary-in report tawi leh inhmelhriattirna hun hmangin T. Upa Richard B.Lalhriatpuia, Bial Leader-in thuchah ṭha tak a sawi baw a ni.

April ni 16 (Ningani) zing dar 6-ah hna kan ṭan nghal a, group hnihah insiamin Group khatin tractor garage sak hna an thawk a, Group pakhatin thawktu quarters sakna tur ban khur an lai a, thing engemaw zat an kit baw a ni. Tukṭhuan ei hun bak chawl lovin kan thawk char char a, khua a lum viau nain member te inpekna a sang hle a, hlim tak leh nuam ti takin hna kan thawk thei a ni. Chawhnu dar 1 velah ban khur pali kan lai zo va, hemi hnu hian garage sakna lamah kan zavain kan bung a. Tractor

garage-ah hian ban paruk
phunin inchhun pariat
vuah a ni a, skirting atan
lung leh brick kan rem
bawk. Heng hna hi ni
khatah kan zo vek a ni.

April ni 17 (Zirtawpni)
zing dar 6 aṭangin kan thawk
ṭan leh a, ruah tlem a tla a,
khaw lum a ti ziaawm deuh.
Zing aṭangin garage chung
rangva kan chih a, a ṭhenin a
bang phelsep an kalh (zawng
dai kalh) bawk a. Tukṭhuan ei
zawhah chhunzawm lehin
chawhnu dar 2 velah kan
thawh tur ang ang chu kan zo
thei ta a ni.

April ni 18 (Inrinni) zing
chaw ei khamah haw turin
kan inbuatsiah a, Headmaster
Quarters-ah lut khawmin
Thawktuten lawmthu te min
hrilhin ṭawngṭaiin min thlah
a. Chumi hnuah haw turin
kan chhuak ta a, darkar
chanve vel kea kan kal hnuah
kan bus awmna hmun kan
thleng leh a. Hemi hmun
aṭang hian dar 9 velah lo
chhuakin chawhnu dar 3-ah

dam takin kan Bial station,
Armed Veng kan thleng leh a ni.

Salem Boarding chanchin tawi

Kum 1978 Synod
Inkhawmpui thurel
bawhzuiin School hmasa ber
hi February ni 10, 1980-ah
hawn a ni a, tunah hian
thawktu 31 awmin zirlai 167
an awm mek.

Rawngbawlina hi hlawm li
in an kalpui mek a, chungte
chu - School, Agriculture,
Kohhran leh Medical
rawngbawlina te a ni. Salem
Boarding hian Tractor leh
Power Tiller an nei a, leilet leh
thlasika thlai chinna buatsaih
nana hman a nih bakah
Tractor hi an mamawh
engkim phurtu a ni a, a
ṭangkai hle a ni.

Salem Boarding aṭanga zir
chhuakte hi Kohhran leh
khawtlang hruaitu ṭha tak tak
an awm ṭhin a, eizawna
kawngah pawh Kohhranah leh
Sawrkara hna thawk engemaw
zat an awm mek a ni•

— KRISTIAN ṬHALAI —

■ Chawl lova tui far reng hian lungpui pawh a tiphel thei.

— Lucretius

SUNNA



**LP. Vanlalchhuangi,
New Chalrang**

LP. Vanlalchhuangi (Ma Chhuangtei) hi Pu LP Rozinga leh Pi Lalhlupuii te fa pasarih zinga naupang ber niin 10 June, 1988 khan alo piang a. Amah hi naupang duhawm tak leh nu leh pa thuawih thei tak, zaidam leh nunnem, mi pawl sawi hlau mi tak a ni a. Thiante huikhawm thiam tak leh rualpawl thiam tak a ni.

A phak ang tawk tawka khawtlang leh Kohhrana inhmang mi niin. Branch YMA-ah kum 2013 aṭanga branch executive committee member a ni a. Property Sub-Committee Secretary te niin Cultural leh Library Sub-committee member ni lai mek a ni a, Tuichangral North Group YMA Zaipawl member a ni mek bawk.

Kristian Ṭhalai Pawl member duhawm tak niin kum 2013 aṭangin New Chalrang Branch KṬP committee member a ni a. Hemi kum hian Daniela Group-ah Secretary a ni a. Ṭawngṭai Inkhawm-ah Secretary niin Evangelical Cell leh Programme Sub-committee member a ni mek bawk. Kum 2012 aṭanga tun thleng hian Khawhai Pastor Bial Zaipawl member a ni. Kum 2013-ah Naupang Sunday School Beginner Dept. zirtirtu a ni a, tunah hian Primary Dept. zirtirtu nilai mek a ni.

A hun hnunung

November 7, 2014 (Zirtawpni) khan an leilet-ah buh zaiin a feh a, a khua a sik avangin thawk ṭha peih meuh loin a haw a, a tuk inrinni-ah chuan a nawm leh deuh avangin a feh leh a, zana chuan a khua chu sik lehin inkhawm pawh a peih ta lova. A khawsik chu a awm tak reng avangin na chhawknate eiin inah a awm a. Ni 11 Nov. thawhlehi-ah Khawhai PHC-ah a inentir a, a nawm

mai loh avangin a tuk nilaini-ah damdawi Inah admit nghal a ni. A zunkawngah hnai a awm tih hriat chhuah a ni a. Zan thum damdawi Ina a awm hnu, November 14-ah Aizawl panpui a ni a. Tluang taka tlanin tlai dar 2-ah Civil Hospital, Aizawl-ah luhpui nghal a ni a. Ultrasound-in anlo en nghal a, chutah chuan doctor ten a La chu a vung deuh tih an hre chhuak leh a ni. Doctor ten damdawi ina admit turin khum awl a awm loh thu hrilhin private ward remchang zawng turin an kawh hmuh a, Ni 17 thawhtanni-ah khum awl remchang hmasa bera admit turin an ti a.

Tichuan, ni 15 Inrinni zan chuan Grace Nursing Home-a Female Ward-ah admit rih a ni a, thisen te la in a result ngaihchan a ni a. Amahah ngaihthatlohna hran a awm loh laiin a tuk Pathianni zing dar 4-ah chuan a thawk lam-ah harsatna a nei ta a, Oxygen pek nghal a ni. Oxygen pek a nihlai pawh hian tawngkam fel takin a betute pawh ala chhang peih a ni.

Ni 16 Nov. Pathianni-ah chuan a thisen atangin Doctor ten Scrub Typhus (Rannung seh) hrik an hmuh thu an sawi a, damdawite pe in a awmdan pawh ala pangngai hle a, ngaihtha taka an awm laiin dar 10:30AM-ah chuan a mit meng a danglam ta thut a, nurse leh doctor ten theihtawp chhuahin an buaipui nghal a. A natna hi a nat em avang leh a chak em avangin biak theih lohin a awm zui ta nghal mai a, tichuan dar 11:30 AM-ah min kal san ta a ni.

A ruang hi Pu PC. Lalbiaktluanga, Dawrpui Vengthar Inah lak a ni a. Dawrpui Vengthar West Kohhranin chawhnu inkhawm thulhin an buaipui a, tawngtaina hun hmangin thlahna hun an hmanga, Dawrpui Vengthar Branch YMA ten kuang mawi tak an siamsak bawk a, an chungah kan lawm takzet a ni.

Tichuan November ni 17, 2014 chhun dar 12:00 khan Bialtu Pastor, Rev. T. Thumliana'n vuiin amah uitu mi tam takin an thlahliam ta a ni. — *Secretary, New Chalrang Br.*



HRINGLANG TLÁNG

Rawngbawlina danglam

Khawvel ram tin hian man chawia hman tur taxi hi kan nei vek mai a; mahse a khalhtute rilru put zia hi a lo danglam thei khawp mai. Ram thenkhat taxi khalhtu, bum tur zawng reng reengin an hmanhlelh laiin thenkhat lahin a man pangngai aia sang lak phêt an tum mek bawk a, mi phurh (passenger)-te hnena Pathian thu hril phei chu a hla khawp mai. Amerawhchu S. Korea rama taxi khalhtute erawh an danglam tlat. Chuan man ringawt an thupui ber lo, an mi phurhte hnenah Pathian thu an hrilh thin tlat asin.

Hyun-sook Han-i chu South Korea ram khawpui pakhat, Busan-a cheng a ni. Ni khat chu mamawh zawrhna dawr lian (departmental store)-ah an bazar a, a Ina hawn nan taxi a la a, taxi khalhtu chu a hming chu Moon-ja Kang a ni. Han-i chuan a nuna thil thleng tur chu a hre phak lo.

A chuanna taxi driver chu Kristian a ni a, tun hma lamin la inhre ngai lo mah se Kang-a chuan Kristian a nih angin a mi phurh hnena Chanchin Tha hril chu a tih tur niin a hria a, a sawipui ngei reng a; biak inah inkhawm turin a sawm zui bawk a.

Han-i'n a sawmna a pawm awangin a lawm takzet a. "‘Lalpa, biak inah rawn hruai thleng ang che,’ tiin ka rilruin ka tawngtai nghal a," tiin Kang-a chu a tawngtai a.

A tawpah phei chuan Han-i chu Lal leh Chhandamtu atan Isua Krist chu pawmtu niin, Kristian a ni zui ta nghe nghe.

Busan khawpuia Kristian, taxi khalhtu 450-te chuan Missionary Taxi Club tih hming puin an intel khawm a, chutah

chuan Kang-a hi member a ni. He Club-a tel member tin chuan an passenger-te hnenah Kristian radio programe an ngaihlaktir thin bakah anmahni testimony an hrilh a; an theih ang angin Chanchin Tha an hril thin bakah inkhawm turin an sawm thin bawk.

He Club-a an president chu Myeong-Woong Ban a ni a, an Club hnathawh hi a chhuang hle a; mahse a chapopui lo. "Kan Club hian nilengin, zing atangin tlai thlengin kawngpuiah Chanchin Tha hril hna kan thawk a, kan Club member zinga tu pawhin thawngtaipui ngai a hriat emaw, kan pisaa rawn lenglut emaw te reng reng hian Isua Krista chanchin an hriata, Chhandamtuah an pawm theih nan kan thiam ang angin Chanchin Tha lo hrilhin kan thawngtaisak thin a; inkhawm turin kan sawi ziah bawk thin a ni," tin an Club hnathawh dan a sawi.

He Club member-te hian Busan kawthler chu an rawngbawl na hmun (mission field)-ah an ngai a, an passenger apiang chu Pathianin an rawngbawl na tura a tirhah ngaiin an theih ang angin Chinchin Tha an hril thin a ni. A Club thil tum ber chu Chatuan hmuna an passenger-te thlarau hruai thlen a nih avangin an thiam ang angin Chanchin Tha an hrilh thin a ni.

— Heather Sells



COUNSELLING MAMAWHITE TAN

Mimal, nupa, fanau, chhungkua, nulat tlangval, ringtu nun etc.-ah harsatna i neih chuan Family Guidance & Counselling Centre pan thin la, an lo tanpui ang che. Telephone leh internet hmang pawhin biakrawn theih an ni.

Mission Veng, Aizawl - (0389) 2324443; Chanmari, Aizawl - (0389) 2306693
Vaivakawn, Aizawl - (0389) 2344324; Champhai - (03831) 234055
Serchhip - (03838) 226128; Kolasib - (03837) 220180
email : synodfgcc@gmail.com

RIMAWI ■■■

Fakna Hla Kûngpui - Isaac Watts

— Malsawmdawngliana
Venglai Branch, Lunglei.



akna hla phuahtu ropui, Sapho phei chuan 'Fakna Hlate Pa' ti hiala an lo sawi thin Isaac Watts hi a hming i lo la hre ngailo a nih pawhin a hlaphuahte zinga pakhat tal chu i hla sak thiam zingah a tel ngei ka ring. A hlaphuah tam tak zinga tlemte, Mizo Kristiante hmuh phaka chhawpchuah a awmchhunte pawh kan Fakna hlate zinga tha leh lar ber berte an ni hlawm. Kum za tam liamtaa a hla phuahte pawh vawiin thlengin Mizo Kristiante'n kan la tuipui a; a hla phuahte hian kan Mizo Kristian hlabuah pawh a 'lai lum' an la luah reng a ni.

A hun hmasa lam: Isaac Watts hi July ni 17,1674 khan England khawpui pakhat Southampton-ah a lo piang a. Unau pakua zinga a upa ber a ni. Isaac Watts-a pian lai vel hian a pa chu England Kohhran (Church of England)

aţang inlakhran duh pawlah a tel ve avangin Lung Inah a tang a; hun engemaw chen chu Isaac Watts hian a nu nen chauh khawhar takin hun an hmang thin a ni.

A naupan lai aţang rengin Isaac Watts hi Thu leh Hla lamah a tui em em a. A bul vela mi inbe laite hi ngun takin a lo ngaithla thin a, an ţawngkam hmante lo ziaak chhuakin a inrem mawi tur zawngin a rhyme a lo siam thlap thin a ni awm e. Kum 13 mi lek a nihin Ţawng chi li ngawt mai a zir hman a; Kum 5 mi lek a nihin 'Latin' Ţawng a zir a, kum 9 mi anihin 'Greek', kum 11 mi anihin 'French', kum 13 mi anihin 'Hebrai' a zir leh a ni. Lehkha a thiamtheih em avangin an khaw mi hausa thenkhat phei chuan Zirna In tha Oxford-ah emaw Cambridge-ah emaw a zir theihna turin sum leh paiah pawh puih an inhuam hle a; mahse hengte hi hnawlin kum 16 a nihin London-a Non Comformist Academy-ah a zir ta zawk a, heta ţang hian a 'graduate' ta a ni.

Hla phuah thiam Isaac Watts : A tleirawl chhuah lai vel hian Isaac Watts chuan Pathian Biak inkhawmnaa an hla sak thinthe chu

a duh khawp lovin a pa hriatah a sawisel deuh fo mai a. Tumkhat a Pathianni inkhawm bang pawh Biak Ina an hla sak thin mawi a tih loh thu leh sak hahthlak a tih zia te, an hla sak thinin a zir loh avanga an Biak In zai dul lutuk a nin thin zia te chu a pa bulah a sawi leh pek a. A pa chuan a ning ve ta deuh a, “Chuti, a aia mawi ngahnge i phuah mai loh!” tiin a lo vin deuh hlak a ni awm e; a pa thusawi chu huatah la mai lovin, fuihnaah ngaiin Isaac Watts chuan Biak ina hla sak tur phuah tumin a rilru a siam ta a ni. Chawlhni leh a lo thlen chuan a hla phuah hmasak ber ‘Behold The Glories Of The Lamb’ tih chu Kohhranah a pe lut a. Kohhran miten an duhin an lo lawm hle mai a; chuta chin chu Isaac Watts hian kum hnih chhung teh meuh mai Pathianni tin Fakna hla thar pakhat tal a phuah ta ziah a ni.

Pathian fakna hla 600 chuang zet a phuah a; a hlaphuahte a thin miten an duh thei hle a ni. Sam(Psalm) sak theiha phuah a thiam em em a, a hlapuah tam tak pawh Sam zia a tanga a phuahte an ni hlawm. Kristian Hlabu-ah hian a hlapuah pariat a chuang a; *Chungte chu*: Hnam tin Hlapui (International anthem) an tih hial

‘Kan Pathian kan puipa pangngai’ K.H.B No.26-nate, ‘Juda maicham chungah’ K.H.B.No.185-nate, ‘Isua Kraws maktak chungah khan’ K.H.B No.187-nate, ‘Ka Lal duhawm ka zahpui lo’ng’ K.H.B No.189-nate, ‘Ka sual atan ka tlantuin’ K.H.B No.216-nate, ‘Khawiah pawh ni chhuahna apiangah’ K.H.B No.248-nate, ‘Lalpa hmangaihtuten’ K.H.B No.321-nate leh naupang te te pawhina an sak thiam em em ‘Khawvel lawmnan a lo kal a’ tih hla K.H.B No.79-nate an ni.

Pastor Isaac Watts : Kum 1702 a tanga khan London-a Kohhran pakhat Mark Lane Independent Chapel-ah Pastor a ni a. A kum leh lawk 1703 a tanga vandaithlak takin taksa lam bawrhawmnain a tlakbuai zui a. A hna tam zawk pawh thawk hleithei lovin amah puitu (Assistant) kutah a dah a lo tul phah hial a. A hrisel lohna chuan a kiansan tak mai loh avangin kum 1712 khan a Pastor hna pawh chu a chawlhnan ta nge nge a ni.

Pumrua avanga hnawl hnu Isaac Watts : Isaac Watts hi Sap pachal ve meuh siah chuan a patê khawp mai, fit nga chauha sang

zük nia mawle! Lemziak thiamten a lem an ziah pawhin a pianzia thupmawi nan Kawrfual lian tak tak an haktir ðhin a ni awm e. A pa têt êm vang hian alawm nupui atana a beisei ve deuh Elizabeth Singer-i lung pawh a dum zawh tak meuh loh ni! Singer-i hian Isaac chu a ngaisangin a thiamna leh finnate chu ropui a ti tehmeuh mai; Mahse pasal atan em chuan ani ang patê lutuk chu a iai ve deuh va, Isaac-a'n nupui atana a sawmna pawh a hnawl phah ta a ni awm e. Mahse he pate reuhte chaklo leh dawrawm tak hi alawm mitena an ngaisanemem, Thu leh Hla hmanga khawvel dengchhuaktu chu.

A sulhnu dangte : Hlapuah bakah thuziak lamah pawh hnuhma ðhahnem tak a nei a. Sakhaw lam chanchin zirbingna thu tam tak a ziaka, Sermon pawh Volume thum ngawt mai a ziah bakah Rilru lam Zirna (Psychology) lamte, Finna leh Thilbul Chhuina (Philosophy) lamte, Vansang lam chanchin zirna (Astronomy) lamte thlengin ðhangthar lo awm zel turte tana thuziak ðha leh belhtlak tak tak a hnutchhiah bawk a. Tun thlenga

amah kan hriatlarna ber zawk erawh a thuziakte aiin a Fakna hlahpuahte an ni ta zawk a nih hi.

Miretheite hmangaihtu Isaac

Watts : Amah hi mi ngilnei leh zawiawi tak mai a ni a. Sum leh pai lamah pawh mihausa a ni lova: mahse, a thilphal em em a, miretheite a hmangaihin a sum neih chhun pawh miretheite tan a pe ðhin a ni. Kum 1748 khan kum 74 mi niin a boral a. Amah hriatrengna lungphun pawh England Biak In lian Westminster Abbey-ah a awm ve nghe nghe a ni.

Tlipna: Isaac Watts-a'n a thiamna leh theihna Kohhran tana a hmang hi a ropuiin a fakawm ngawt mai; hla phuah thiam a nihnaah, ama lunglên zawng leh in leihbuak nan chauh ni lovin, Pathian biak ina sak tur tinzawnin hla a phuah a; chu chu kohhran tan malsawmna a lo ni ta a ni. ðhalai te hian kan theihna te hi Lalpa Kohhran tan hmang uar deuh deuh ila; min siamtu Pathian tana kan thiamna leh theihna te hlan lêt ve tur kan ni tih hi Isaac Watts-a nun aţang hian i zir thar leh ang u ♦



KANTU

Tuikual North Br.



uikual North Branch Kristian Ṭhalai Pawl hi August ni 15, 2007 a din ṭan a ni a. Kuminah hian member 519 (mipa 312 leh hmeichhian 207) an awm mek a ni.

Branch Committee member hi 26 (OB 6, Committee 16, Kohhran Committee aiawh 2, Bialtu Pastor leh Pro-Pastor Ex-Officio 2) an awm a. Thla tin Thawhlelni vawihnihnaah Branch Committee an nei ṭhin. KṬP Day an ngai pawimawhin mi harsa te hnenah ṭanpuina pein Branch hnatlang an la nei thei zel a, an Branch din champha (15th August) ah Blood Donation camp an nei ṭhin bawk. Group hruaituten memberte tlawh chhuakin inkhawm, hla zir leh hnatlang tur ten an sawm ṭhin a, an hlawkpui ṭhin hle. Kohhranin Gospel camping a siamin camp lut tur zawngin Branch

Committee member te an thawkchhuak ṭhin bawk a, hei bakah hian special camp, retreat leh member hla te puala rawngbawlina kalpui hi an hmalakna tam zawk niin Pathianni zan inkhawm banah member hla te pualin ṭawngṭaina hun an hmanṭ ṭhin a ni. An din tirh aṭangin kum tin Bethel vawi 1 emaw vawi 2 emaw an la nei thei zel bawk. Zaipawl rawngbawlina hi an ngai pawimawh hle bawk a, music video siamin AIR ah pawh recording an lo ti tawh a. KṬP member boral an awmin ralna hun hmangin Dekchi leh Kristian Hlabu an hlan ṭhin a, Matric, Class XII, Bachelor leh Master Degree hmu thar te leh Competitive Exam-a hlawhtlingte hnenah lawmpuina an hlan ṭhin bawk. Tin, Biak In hawnga nupui/pasal nei hnenah lawmpuina an hlan ṭhin bawk a ni.

Branch tih chak nan Group li ah inthenin Isua zirtir unaute hming chawiin Petera, Andria, Jakoba leh Johana tih a ni a, Group budget hi Rs. 10,000 theuh an nei a, Branch budget atan Rs. 7,30,000 an nei baw a ni. Biak In sa lai an nih avangin kum 2009 ațang khan Biak In sound system leina atan Rs. 5,00,000 chu project ah an nei a, nikumah khan he project hi tlin tawh mahse Biak In sak an la zawh loh deuh avangin cheng nuai ruk chuang chu fixed in an deposit rih a, kumin hian KTP sound tihchangtlun nan Rs. 1,00,000 project an nei baw. An sum hmuhna tlangpui chu Thawhtan zan thawhlawm, Thawhlawm Ip, Project Ip, Group Budget, Blanket suk, Thiamthil/Phalthil thekhawm lilam te ani.

Branch hmalakna tichak turin Sub-Committee 8 (Programme, Finance, Zaipawl, Evangelism, Sound System,

Refreshment, Banner & Decoration, Archive) incharge hrang hrang an insiam a, hengte hian Branch Committee hriatpuina in chak takin hma an la a, Branch pawhin an hmalakna a sawtpui thin hle. Kristian Thalai chanchinbu hi copy 176 an la mek a, kum 2007 ațangin kohhran chhungkuaah Chanchinbu Vox Dei(Pathian Aw) an chhuah tan a, Pathianni zing apiangin copy 385 an sem thin a ni.

Pathianni chhunah fellowship an nei thin a, tawngtai rual, rilru sawi, hla zir leh thupui zir nan hun an hmang deuh ber thin a ni. Thawhtan zanah Pathian biak inkhawm neiin sermon, thupui zir, rilru sawi leh special programme siamin hun an hmang thin a, Central ațanga bawhzui tura ruahmanna an siam apiang hi an phak ang tawkin an tihlawhtling ve thei zel baw a ni♦



■ I dinna chu intlansiakna kawng dik tak ni mah se, i t̄hut tlat chuan midangin an tlanpel tho ang che — Will Rogers

Keimahni



■ **PYF Biennial Conference :** Presbyterian Youth Fellowship (PYF) Biennial Conference vawi 21-na chu May 1-3, 2015 chhung khan Khliehriat Presbyterian Church (Meghalaya)-ah tluang taka neih a ni a, thupui atan II Kor.2:5 tlawhchhanin "Youth - The Aroma of Christ" (Ṭhalai - Krista rimtui) hman a ni a, palai inziak lut zawng zawng 492 an ni a, Mizoram Unit aṭangin palai ruat 57, Synod Choir 22 leh CKṬP hruaitu 13 an tel thei. PYF Youth Camp 2016 (Oct. 21-23) chu Jingiasem Samla, KJP Synod Sepngi-in an thleng ang a, PYF Biennial Conference vawi 22-na (May 5-7, 2017) chu PYF, Manipur Presbyterian Church Synod-in an thleng ang. Kum 2015 -2017 PYF hruaitu thlan thar zingah CKṬP aṭangin Asst. Secretary atan Tv. Joseph Lalsangzuala leh Central Committee member-ah Pu K. Lalruatpuia te an tel.

■ **Falkland Branch:** May 11, 2015 zan khan Falkland Branch KṬP Inkhawmah YRC Awareness Campaign neiin Pu K. Lalruatpuia leh Pu V. Lalrinmawia te an kal. Pu V. Lalrinmawian YRC chanchin a sawi a, zawhna leh chhanna hun te hawn a ni.

■ **NEICCYA Biennial Conference:** May 15-17, 2015 chhung khan Aizawl Temple Corps, Temphle Square, Aizawl-ah North East India Christian Council Youth Assembly Biennial Conference vawi 16-na tluang taka neih a ni a, thupui atan "Out of the Comfort Zone" tih hman a ni a. Palai in report 408 an ni a, Mizoram KṬP aṭangin palai 53 an tel thei a, CKṬP hruaitu 12 an tel thei bawk. Kum 2015-2017 NEICCYA hruaitu thlan thar a ni a, CKṬP Committee member Pu P.C. Biakmuanpuia chu Secretary atan thlan a ni.

■ **Synod Choir Retreat :** Synod Choir member-te puala Retreat leh hla zir camp May 21 -23, 2015 khan neih a ni. May 21 ṭlai dar 6:00-ah Pi Zaii Hall-ah a hawwna inkhawm buatsaih a ni a, CKṬP Committee member ten kan telpui. Asst. Secretary Dr. Lalliansangan a kaihrui a, GS Upa Zonunmawian puan tur ṭulte puangin Choir

Conductor Pu Lallianmawia Tlau-in inhmelhriattirna neiin thu tawi a sawi a, Leader Rev. J. Lalremsiaman thuchah a sawi a, a duh apiang tan thusawi hun hawn a ni a, tawngtairualna hun hman a ni baw. Zanriah kilho zawhah resource person Upa Lalthansanga, Aizawl Venglai-in hun a hmang. A zan hnihna (May 15) programme T.Upa Richard B. Lalhriatpuian hunserh a hmang a, CKTP Committee atangin resource person atana ruat Pu V. Lalrinmawian hun a hmang. Retreat-ah hian Synod Choir member an tel kim thei a ni.

■ Agape Centre kum 23-na : Agape Centre, Ropaiabaw, Chawlhmun chuan May 12, 2015 an kum 23 tlinna an lawm a, Central KTP Committee min sawm a. CKTP aiawhin Dr. Julie Remsangpuui (Treasurer) a kal.

■ **Falkawn Hmarveng Branch:** May 25, 2015 zan khan Falkawn Hmarveng Branch member inkhawm kim zan hmanpuuin GS Upa Zonunmawia a kal a, Tv. David Vanlalpeka (Soloist), Mission Veng-in a tawiawm. Bial OB-te leh Bial Zaipawl-in inkhawm hi an hmanpui baw a, inkhawm zawng zawng 130 an ni. Hemi zan inkhawm thawhlawm hi Hospital Charity Fund puala lakkhawm a ni a, Rs.1,519/- an tlin thei a ni.

■ **YRC laih hna :** May 11-25, 2015 chhung khan Youth Recreation Centre hmun, Falkland ram chu a laih zawl hna thawh a ni . Excavator 1 leh tipper 7 hman a ni. Hna enpuitu Supervisor Tv. Rualthankima @Sena (Armed Veng South KTP Com. member) rawih a ni a, YRC Sub Committee member ten an invil chhawk baw.

■ May 29 - 31, 2015 khan Mualcheng Branch KTP Diamond Jubilee lawm a ni a, inrinni tlaiah lawmna ruai theh a ni. Central KTP hruaitu Pu C. Laldingliana leh Pu Zonunsanga Ralte (Committee Members) te he hun hmanpui hian an kal a, hruaitu kalte hian Pathianni zingah Pu Zonuna'n Pathian thuchah sawiin Pathianni zanah Pu Madinga'n a sawi a ni.

■ May 30 & 31, 2015 khan Serchhip Bial huapin Bethel Kohhranah Bial KTP Meet cum Leadership Training neih a ni a, hemi neihpui hian Central KTP hruaitu T.Upa T. Lalawmpuia leh Tv. Joseph Lalsangzuala (Committee Members) te an kal. Hruaitu kalte hian Inrinni zanah Tv. Josepha'n thuchah sawiin Pathianni chawhnuah Pu Awmpuia'n thuchah a sawi baw a ni.

■ **EYEP/I LOVE Taiwan Programme:** Ecumenical Youth Exchange Programme hmanga Taiwan-a kal turin Tv. R. Lalramnghaka (Fin. Secy) leh TUpa Richard B. Lalhriatpuia (Com member) ruat an ni a. Presbyterian Youth in Taiwan hotute hnenah kal tura kan ruatte bakah mahni insengsova kal duh volunteer kan zawn thu pawh hriattir a ni a, lawm taka an lo dawnsawn tur thu chhanna kan dawng tawh bawh.

SYNOD CHOIR RAWNGBAWLNA

- 1) May 1-3, 2015 khan PYF Biennial Conference vawi 21-na (Khliehriat Presbyterian Church)-ah an zai a, tum 4 dinchhuahah hla 6 an rem.
- 2) May 8-10, 2015 khan Hmarphei Presbytery KTP Meet vawi 3-na (Vaitin)-ah vawi 4 dinchhuahah hla 7 an rem. Vaitin-ah hian May 10-ah MAP Outpost-ah Morning Devotion hmanpui tura sawm an nih angin an zai bawh a, vawi 1 dinah hla 2 an rem a, Director Pu R. Lalruatkiman thuchah a sawi.
- 3) May 17, 2015-ah NEICCYA Biennial Assembly vawi 16-na (Aizawl Temple Corps)-ah vawi 2 dinah hla 2 an rem.
- 4) May 17, 2015 zanah ram pum huap Pavalai Meet vawi 2-na (Khatla Kohhran Biak In)-ah vawi 1 dinah hla 1 an rem.
- 5) May 18, 2015 zan khan KTP, Chanmari Bial huap Zaipawl Night (Chanmari Kohhran Biak In)-ah vawi 2 dinah hla 2 an rem.
- 6) May 24, 2015 (Pathianni) zan khan Kulikawn Vengthlang Kohhran Biak Inah an zai a, tum 2 dinah hla 4 an rem.
- 7) May 25, 2015 (Thawhtan) zan khan Zarkawt Biak Inah Zaipawl Night an hmanpui a, tum 3 dinah hla 6 an rem.

2016 GENERAL CONFERENCE HLA BU

General Conference Hla Bu buatsaih a lo hun leh ta a. Kum 2016 KTP General Conference Hla Bu-a hla thawh duhte tan July ni 15, 2015 thleng hun hawn a ni a, General Secretary, Kristian Thalai Pawl, Synod Office, Aizawl – 796001-ah thawn tur a ni ang. Hla thawh duhte chuan henge hi chiang taka tar lan ni se:

1. Hla phuahtu hming dik tak, hla phuah ni, thla leh kum. Hla phuah chhan leh phuahtu chanchin tawi. Hla phuahtu biak pawh theihna number dah tel ni bawh se.
2. Hla thluk siamtu, Hla harmonised-tu hming leh solfa part kim ngeia dah tur a ni.

CENTRAL K.T.P HRUAITUTE, 2014 – 2016

Office Bearers

Leader	: Rev. J. Lalremsiama	9862669230
Asst. Leader	: Pu Samuel Laldingliana	9436198740
Gen. Secretary	: Upa Zonunmawia	9436152024
Asst. Secretary	: Dr. Lalliansanga	9612241873
Treasurer	: Dr. Julie Remsangpuui	9436142235
Fin. Secretary	: Tv. R. Lalramnghaka	9436351374

Committee Members

Pu R. Lalruatkima	9436360571	T.Upa Richard B. Lalhratpuia	8974287347
Pu C. Laldingliana	9436140834	Upa K. Rorelkima	9436153444
Pu Lalhangvunga Sailo	9862381275	Pu V. Lalrinmawia	9862563362
T. Upa T. Lalawmpuia	9436366519	Pu Ngurhmingliana	9436374104
Tv. Joseph Lalsangzuala	9436152063	Pu Vanlalpeka	9436153728
Pu Lalchhuanliana	9862364583	Pu K. Lalruatpuia	9862577177
Pu P.C. Biakmuanpuia	9436374833	Pu Zonunsanga Ralte	9402113038
T. Upa Lalmanpuia	9436142398		

Ex-Officio Members

Rev. Lalrinmawia	–	Synod Moderator
Rev. B. Sangthanga	–	Secretary (Sr.)
Rev. P.C. Pachhunga	–	Executive Secretary, i/c KTP



Chanmari West Branch te chuan June ni 4, 2015 (Ningani) khan YRC puala sum tuakna tum khatna atan an Kohhran huam chhungah Sangha zuarin hnatlang an nei. Group hruaituten Sangha lei duh tur mahni bial theuha kohhran chhung tinte hnenah an zawt hmasa a, Sangha buk leh pack hnatlang branch leh group hruaituten neiin chawhnu lamah group hruaituten mahni bial theuhah an sem a. Sangha Quintal 2 leh kg 80 an hralh zo thei a ni.

YRC puala Central KTP-a an chhun luh tur chu ₹45,850/- a ni a, tlak ngei turin kawng hrang hranga hma lak chhoh zel tum a ni.

Postal Regn. no. MZR/81/2015-2017
RNI No. MIZMIZ/2009/29074



Serchhip Bial KTP leadership training



Mualcheng Branch Diamond Jubilee



Kantu : Tuikual North Branch

Printed & Published by Zonunmawia, Synod Office, Mission Veng on behalf of Kristian Thalai Fellowship
Edited by Lalmuangpula and printed at Synod Press, Mission Veng, Aizawl, Mizoram , Copies - 40,000